



Fasnacht 2025  
**SANS GÈNE STAMM**  
Basel 1922

## ESCape: D Flucht vor em Affe-Theater

In Zitte vom gruusige bruune Narziss,  
isch dr ESC ägedlig e riise Bschiiss...  
oder e Fanaal in glitzerndem Gwand  
und e Häilmittel geege dr Wältbrand?

S sinn doo alli willkomme, glich wäär,  
alli veräinigt in Eggstase, glich wohäär.  
Scho fascht wie d Frau Faasnacht,  
wo wit und bräit allne Spass macht.

E Wältaalass für e gläini Stadt isch famoos,  
dr Wunsch no Grössli isch do gaar grooss.  
S internazionaale Flair kennt me in dr Stadt,  
s Lääbe im Dreiland findet jeede Daag statt.

E Theaater! Dr Voorhang fallt scho glii,  
und alli in däre Stadt sinn doo drbii.  
d Stadt isch die Wuche bumsvoll,  
loogisch, finde daas nit alli toll.

Isch d Gritigg pragmatisch oder biider?  
D Beweeggründ äärnscht oder niider?  
Isch d Bolitigg Muusig, Muusig d Bolitigg?  
S Büünebild isch schampaar schigg.

E Büüni für Bootschaft, e Büüni zum liebe  
e Büüni für Säilschaft, e Büüni zum liege.  
E Büüni, wo jeedi für sich sälber bruucht,  
e groossi Büüni, wo gaar viil Gäld bruucht.

Es isch äifach z viil, wenn s äim z viil isch,  
wenn s äim z viil isch, will s halt z viil isch.  
Zwiifflisch, ob d Büüni basst in die Stadt,  
wo halt scho no gläi isch, s isch Faggt.

S git e männg, wo oordentlich brofittiert  
äini, wo über Sinn und Zwägg sinniert.  
E männg het gaar e Feeriesperri bikoo,  
sowisoo isch s e männgem z lut esoo.

D AirBnB-Briise sinn dails astronomisch,  
und zwoor hooch, s isch scho koomisch.  
Genau esoo het me Mässe verdriibe,  
isch d Giir genau glich grooss bliibe?

So zwingt me e männg uss dr Stadt,  
e groosses Affetheaater findet statt.  
Jeedi Faane wird z rächt gruggt,  
d Meedie spiile scho verruggt.  
D Matuur wird äifach verschoobe,  
im Joggeli git s käini Dopingproobe.  
D «GEKO» git s scho im Feebruaar,  
Baasel bikunnt dr näggscht Superstar.

Und dr Conradin danzt vo Glügg,  
Hoolt sich si hisdoorischs Stügg:  
Dr ESC ab Volggsabschtmig.  
Hey, Luzi-fer, lueg nit so grimmig!

Lieber Theaater als e «Musk-erade»,  
Hesch dr Spott oder dr Schaade?  
Bisch Contra oder bisch Pro?  
ESC – du kaasch jetzt koo.

---

*D Ladäärne-Uusstellig uff em Minschterblatz und  
d Waage- n und Reggwisyte-Uusstellig by dr Kasäärne  
sinn vom Määntig znacht bis am Mittwoch demoorge!  
Deert und an de drey Verkaufsschtänd (CINS) in dr Schtadt  
kaa me n au alli Zeedel und Schnitzelbängg, d Blagedde n  
und dr Rädäbäng kaufe.*

---

*Am Frytig, 14. und Samschtig, 15. Meerz findet uf em Barfi die  
1. Lektion statt. Fasnacht für alli zum Kennelehre und Usprobiere!*

### **BISCH DERBY, E STRIZZI Z'SYY?**

Am Samschtig, 15. Meerz vom zwei bis am fümfi  
(14 – 17h) kasch diräggt in unserem Glyggekäller  
im Gärbegässli 30 zum Schnuppere und lischrybe verbyy ko.  
Oder kum ganz unverbindig an unseri Schnupperschtund am  
Donnschtig, 3. April vom säggsi bis siibni  
(18 – 19h) in unserem  
lebigs- und Arbetskäller an dr Innere  
Margrethestrooss 15  
**Mir freue-n-ys uff di!!!**

Wyteri Informatione und Aamäldig  
uff unserer Websyte  
[www.sansgene.ch](http://www.sansgene.ch)

